



SYNOD Newsletter

Volume XXVI

No. 345

E-mail : synodnews@gmail.com

JUNE, 2012

SYNOD EXECUTIVE COMMITTEE VAWI 239-NA AH THU PAWIMAWH TAK TAK REL A NI

* Pavalai Pawl Inkaihhraina siam a ni

* Mipat hmeichhiatna chungchang pawm dan puan chhuahna siam a ni

Synod Inkhawmpui thurel bawhzui ngaite bawhzuia Synod Inkhawmpui leh Inkhawmpui inkara rel fel ngai thil pawimawhte reltu, thuneihna sang tak nei, Synod Executive Committee (SEC) chu ruahman lawk aia ni khata a hun pawt sein June 5-8, 2012 chhung khan J.M. Lloyd Hall, Synod Office-ah an thu a, Committe vawi 239-na a ni. Tun tum Committee-ah hian member 141-ah 128 an kal thei. Hun dang ang bawkin Synod Inkhawmpui thurel bawhzuia chin fel ngaite ngaihtuaha rel a ni a, chung zingah chuan thil thar chhinchhiah tlak tak tak pawh a awm.

Synod Secretary Report atanga thil langsar deuhte chu hetiang a ni -

1. Inkhawmpui hrang hranga Synod aiawh palai intirhna hmun kuaah Synod aiawh an kal a, chung Inkhawmpuite chu Presbyterian Church of India (PCI) hnuiaia Synod pasarih leh Lairam Isua Krista Baptist Kohhran (LIKBB) Assembly leh Evangelical Church of Maraland (ECM) Assembly-te a ni.

2. Synod hruaitute Officers Meeting (OM) leh Evangelical Church of Maraland (ECM) hruaituten Kohhran pahni kal zel dan tur chungchanga inkawmhona, April 3, 2012 khan Synod Office-ah an nei.

3. Tripura Mission Field chhungah Synod thu angin Presbytery thar pahni - Baramura Presbytery leh Longtorai Presbytery-te chu May 12, 2012 khan hawn a ni a. Heti hian Mizoram Presbyterian Kohhran Synod hnuiaia Presbytery 50 (Mizoram chhungah 34 leh ram pawnah 16) a awm ta a ni.

4. Synod Inkhawmpui 2011-in Aizawl khawpui leh a chheh vela ram lei a lo rel tawh angin Bawngkawn, Aizawla Pu Jantere-a (L) fate ram zau taw tak chu Rs.5,48,00,000/-in lei fel a ni.

5. PCI General Assembly vawi 40-na, Mizoram Presbyterian Kohhran Synod thlen tura tih chu Champhai Vengsang Kohhran Biak Inah May 2-6, 2012 chhung khan neih a ni a, palai an kal tha hle.

6. Synod hnuiaia thawk Aizawl khawpuia awm, Ordained Minister ni lote inhlawm khawmna, Synod Lay Worker's Fellowship te intawh khawm (Annual General Meeting), 'Lay Day' tia sawi thin chu May 25, 2012 khan P.C. Girls School-ah Synod Office leh P.C. Girls School-ten inthlen tawmin hlim

taka hman a ni a, member 500 chuang zet an kal.

7. Synod Hospital-a thawktute pension sum Employee Provident Fund Organisation (EPFO)-in hun eng emaw chen a thu hnuiaia a dah hnuin Mizoram sawrkar hotuten thahnemngai taka hma an lakpuina azarah EPFO thu hnuiaia awm lo turin relaxation pek an ni a, a lawmawm hle.

8. Synod sum hmuh leh hmunnate en dik tura ruat, Synod Auditor-ten en dik hun tura ruat chhungah an en dik zo thei a, an endikna report thlir a nih hnuah pawm a ni a, Synod hnuiaia rawngbawl na peng hrang hrangten him tak leh fel taka sum an vawn thu dawn a ni.

9. Manipur-a Synod Mission rawngbawl na hnuiaia Kohhrante enkawl hna anmahni (A ram mite) kuta dah tura Synod-in a lo rel tawh avangin hemiin a nghawngte chin fel zel a ni a. Manipur Mission Field-a ordain ni lo Mizo thawkte Mission Field hrang hranga thawk zui tura sem darh an nih tawh bakah Minister/Pastor-te pawhin hetiang hian an thawhna tura ruatah an hna an zawm fel ta-

- 1) Rev. Vanlalnunmawia Zawngte - Bangalore-ah;
- 2) Rev. Lalhmachhuana Ralte - Odhisa-ah;
- 3) Rev. Daniel Lalmalsawma Sailo - Missionary Training College (MTC)-ah;
- 4) Rev. R.K. Lalnunmawia - Presbyterian Bible School (PBS)-ah;
- 5) Rev. Jerome Lalchhuanga - Udharbond Bial-ah



10. SEC 238-naa Presbyterian Church USA nena thawhhona tihtawpin a nghawng theih tura ngaihte chu thutlukna siam ngai a awm hrih lova hriat a ni.

Synod Executive Committee vawi 239-na thurel langsar deuhte chu -

1. Pavalai Pawl Inkaihhraina: Synod Inkhawmpuiin Pavalai Pawl Inkaihhraina siam a rel angin Pavalai Pawl Inkaihhraina siam a ni a, Pavalai Pawl thil tumte chu - (1) *Mi dangte Krista hnena hruai*; (2) *Kristian Chhungkaw tha din tura tan lak leh* (3) *Kohhran hmalakna tawiawm* te a ni a. Innghahna thupui atan "Krista tana nun" (Phil. 1:21) a ni.

Pavalai Pawl hi Kohhran Committee hnuiaia Fellowship niin Kohhrana mipa puitling chin member nih theihna tura tih a ni a, Synod Revival Committee enkawl na hnuiaia awm tura tih a ni a, Bial Standing Committee leh Presbytery Standing Committee-in Bial huap leh Presbytery huapa intawh khawm chu tul a tih chuan intawh khawm (Meet) buatsaih theih a ni a; ram pum huap intawh khawm pawh Synod Revival Committee-in tul a tih anga buatsaih tura tih a ni baw.

2. Mipat hmeichhiatna pawm dan puan chhuah: Mipat hmeichhiatna chungchanga Mizoram Presbyterian Kohhran pawm dan puan chhuahna siam a ni a, chuta thu hlawm hrang (point) pathum sawite chu hetiang a ni -

Phek 4-na Chhungkaw Chanchin hnuiaia ah zawm a ni

SYNOD Newsletter

EDITORIAL STAFF

Rev. K. Lalpiangthara (LPT)
Rev. B. Lalngkhakliana (BLNG)
Upa H. Ronghaka (HR)
Upa C.H.Thangkhuma (HTK)

Editorial

KAN HAN COMMITTEE PHAWT ANG E

Kohhran pawl dangakan unau thenkhatten min fiam ve fona chu, "Lal Isua pawh hi lo kal se Presbyterian Kohhran chuan 'kan han committee phawt ang e' an ti ang," tih hi a ni a. Hei hi fiamthu a nih rualin Presbyterian Kohhran nihna thui tak lailangtu a ni a, huat ahnêka lawm viauna tur a ni zawk. Kohhran thenkhat an buai fona chhan chu Committee thu lova mi mal thua thil a kal thui lutuk thin vang niin a lang.

Vawiin thlenga Committee leh Inkhawmpui thu zah leh ngaichang thiam taka kan kal zel theihna hi chak taka hma min sawn tirtu pawh niin a hriat. Kan Synod Moderator te leh nihna pawimawh tak tak lo chelh tawhte pawhin a tul chuan Bial an vawng ve leh mai a. Bial vawn nuam ti em emte pawh Committee leh Inkhawmpuiin 'chutah zawk' an tih chuan an kal leh mai zel a. Hruaitu nihna kan lo chelh tawhin a hnu lamah pawh engmah khak buai a nei zui ngai lote hi Presbyterian Kohhran inpumkhatna tiñhatu a ni kan ti lo thei lo vang.

Tualchhung atanga General Assembly thlenga kan inkaihruai danah mi mal thu emaw, mi tlemte thu emaw aia Committee thu leh Inkhawmpui thu kan ngaih pawimawha, 'kan han committee phawt ang e' kan tih zel theih chung chuan kan inpumkhat reng ang a, Lalpan a ram zau nan min hmang zel ngei ang.

HRIATTIRNA


Synod Hospital, Durtlang chuan G.N.M. zir tur a la dawn a, Prospectus/Application Form Dt. 11th June - 7th July, 2012 chhungin Principal Office, School of Nursing, Synod Hospital, Durtlang, Faser's Clinic, Mission Veng-ah dar 9:00 a.m. - 4:00 p.m. chhungin lei theih a ni e.

Application hi ni 7th July, 2012 ral hma ngeiin Principal Office, School of nursing, Synod Hospital, Durtlang-ah chauh theh luh tur a ni e.

Prospectus/Application form man ₹ 100/-

Dil thei chin:

1. 10+2 emaw a tlukpui pass, 45% mark hmu chin.
2. Nupui/Pasal la nei lo, kum 17 - 35 inkar.


(Dr. LALREMTANGA)
Director
Synod Hospital, Durtlang.

ZAWHNA leh CHHANNA

"Isu i hmingin ka/kan dil a che," tia tawngtai hmawr kan bawh thin hi kan Kohhran, Presbyterian tih dan tur a ni lo em? Han sawi zau teh.

- R. Sanghmingthanga
Serchhip Bazar Veng

Chhanna: "Isu i hmingin ka/dil a che," tih hi Trinity thurin pawn ve lote tawngtaina hmawr bawh dân a ni a. Presbyterian Kohhran ziding pangngai chuan, Isua (Krista) hmingin Pathian hnenah kan dil thin a. Amah kan Lal Isua ngeiin, "...ka hminga Pa hnena in dil apiang a pekna tur che uin," (Joh. 15:16) tih hi kan Bible chang inngahna pawh a ni e. Kohhran pawl hrang hrang kan inneih pawlh nawk nawk hlawn a, kan mi leh sate zingah pawh tih dan hmasa la hmangte pawh awm theih a ni ang. Isua (Krista) hmingin Pa (Pathian) hnenah i dil thin ang u.

REDUCTION SALE

Synod Bookroom chuan Aizawl khawpui chhunga Branch hrang hrangah lehkhahu, etc. a man tihniamin June 5-7, 2012 chhung khan an zuar a, ₹ 17,10,914/- man zet an hralh hman.

HRIATTIRNA

Kum dang ang bawkin a hnuaia hun leh hmun tarlan ang hian Pastor/Pro Pastor nupuite intawh khawm leh tur a ni a. Mi mal hnenah hriattirna thawn chhuah a nih loh avangin hei hi hriattirnaah ngaih tur a ni e.

A hun : Dt. 24.10.2012 (Nilaini)
dar 10 :00 a.m. – 3:00 p.m.
A hmun : Synod Conference Centre

CHAWHMA HUN

Hruaitu : Pi R. Lalnunmawii,
w/o Rev. Thangzauva,
Synod Moderator
Tantu : Pi Thangseii,
w/o Rev. Lalchama,
Durtlang Leitan
Thupui : **Pastor chhungkaw Thlarau lam nun** (Luka 10:41 - 42)
Sawitu : Rev. Lalsangbera, Kulikawn

CHAWHNU HUN

Hruaitu : Pi Lalrinpuii,
w/o Rev. Zosangliana Colney
Solo : Pi Zaneihchhungi
w/o Rev. G. Chhunthuama
Thusawi : Dr. Ruth Lalmuanpuii
w/o Rev. Dr.K.Lallawmzuala, ATC
Solo : Pi Lalruotmawii
w/o Rev. Rammawipuaia,
Champhai Kahrawt
Thusawi : Dr. Lalremmawii
w/o Rev. F. Lalchhuanmawia,
Lunglei Chandmari

Sd/-
Thanzami
w/o Rev. Vanlalzuata

Sd/-
R. Lalnunmawii
w/o Rev. Thangzauva

NUN DAN

KOHHRAN CHAKNA

Tun tum chu Kohhran chungchang bawh sawi zui leh ila; a bulthut, Tualchhung Kohhran lamakan thawh hodan lam hitawi tein umzui law law teh ang. Kohhranhote hian 'chak leh nung' nih kan duh theuh a; hmunhma leh Biak in tha te, hall leh thil hrang hranga changtlunna lam hi 'chak' tehnah kan hmang ta emaw tih mai tur a ni. Hengte hian kan rilru a hruai sual palh ang tih a hlauhawm thei ta hial a ni. Heng thilte hi Kohhran mamawh, a lova kan awm theih loh vek a nih avangin a t ha apiang chu duhthusam a ni ngei mai; hetih lai hian rualawh luat vanga mahni phak loh neih tum Kohhran kan pung tawlh tawlh erawh hi chu inen that kan ngai ta niin a lang.

Kohhran hian building leh hmanraw tha aiin member-te hi kan thil neih (asset) pawimawh ber a ni tih kan hai palh ang tih a hlauhawm khawp mai. Kohhran chakna chu member-te inpumkhatna hi a ni a, inpumkhatna atana hmanraw pawimawh ber chu inngaihsak tlanna hi a ni; Pathian atanga chhuak hmangaihna dik taka inthui khawmnaah chuan member-te an lawm tlang thin. Hruaituten building tha aiin Kohhran member-te kan ngaih pawimawh hmasak a tul a, member-te inlungualna hmuna chuan hmuh theihin Pathian kuthnu a lang nghal thin a. Kohhran-a Committee hrang hrangte hian member-te hi kan awm chhan an ni tih hriain anmahni ngaihsak hi kan hna hmasa berah dah thei ila a duhawm hle. Biak in leh Hall tha taka thawl deuha awm ai chuan, chhe deuh zawk pawh ni se a chhung luah khattu awm hi a hlu zawk daih a; chutiang Kohhran chu Synod thlenga kan chakna thahrui an ni.

Kohhranin "rawngbawltu" a tihte zinga mahni nihna hre lo kan awm chuan Kohhran chakna leh hmasawna tiñhuan-awptu kan tling phak a ni. Rawngbawltu inkhawm taima te hi Kohhran ban leh thahrui pawimawh an ni a, Kohhran member lam pawh chutiang tho chu kan ni. Hruaitute kan phutna a san viau laiin an hmuh leh biak phakah kan awm em tih te pawh inen ila; Kohhran hruaitu leh rawngbawltu tha kan neih theih nan i tawngtai tam lehzuang u. Pathian Kohhran hi Upate ta ni lovin 'kan Kohhran' titu apiangte ta a ni a; a chhiat a that thua te, a nawm leh nawm loh thua pawh member zawng zawngin mawh kan phur theuh bawh. (CTK)

PAVALAI REVIVAL MEET

June 2&3, 2012 khan Pavalai Revival Meet vawi 7-na, Zarkawt Kohhranah hman a ni a, Aizawl khawpui chhunga Kohhran 100 atangin palai 2141 leh Aizawl pawn lam Kohhran atangin palai 1102, an vaiin palai 3243 an kal. Pavalai Pawl hi Kohhran 331-ah an ding tawh a ni.



“Indona, Indona,” tiin Râl Vêngtu chu mite lam hawiin a au vak vak mai a. Mite chuan, “Râl Vêngtu, silai puak ri vawikhat te pawh hriat tur awm si lova engtiziaa ‘Indona, Indona’ tia au vak vak nge mawn i nih le?” tiin an zawt a. Râl Vêngtu chuan, “Khawvel Indopui II-naa United States-in Hiroshima leh Nagasaki-a Atom bomb an thlak aia ring zawk kha tuktin hriat tur a awm alawm. In bengte hi khawi lamah nge mawn in chhit le? bengtululho! Khawvel hneh theihna khawlha 26 hmangin tuk tin party hrang hrang an in bomb chhawk ul ul a, heng rite hi in hre lo em ni? Kan Lal Isuan, ‘Khawii ram pawh mahni indo apiang an boral thin; chhungkhat pawh mahni indo chu an boral thin. Setana pawh mahni a indo chuan, a ram engtin nge a din chhuah ang?’ tia a sawi kha a thleng dikin a rinawm si a,” a ti lung lung a.

Mite chuan, “A ni thei mai awm mang e, silai puak chiaah lo mah se Kohhran leh ram vei tak taktu bengah chuan bomb ring tak puak ang a ni ringawt mai dawn a nih hi. Bomb thlaktu anga han ngaih theih ho lah hi han belhchian chuan mahni awmna Kohhrana rawngbawltu, hmun pawimawh tak luah lai an lo ni ve leh tlat zel a. Ram khat chhunga Kristiante kan indo ul ul reng mai zawng a nia leh ! Kan ram hian mahni thiam thu sawi lo ngam khawpa huaisen hruaitu leh rilru dik tak pu chunga tawngtaipuitu a mamawh ber zawng a nih hi ! Ram leh ram indo, ding chhuak lo tur kan ni ang tih ava hlauhawm tak em !” tia indawm kun ngaih chungin mite chu an haw ta dam dam a.

PATHIAN THU ZIR DUH TAN

Presbyterian Bible School, Mission Veng, Aizawlah Session 26-na atan Certificate in Theology (C. Th.) Admission hawn a ni a. Dil duhte tan a hnuaia tar lan hi hriat tur a ni a; Admission Form chu Office hun chhungin Rs. 10/- a lei theih a ni.

Dil hun chhung : September 3, 2012
tlai dar 3:00 thlang.

Dil thei chin : Class VII passed,
kum 16 chin, Kohhran dan
chhunga awm

Interview : Sept., 5, 2012 (Wed)
chawhma dar 10:00

Class tan hun : September 7, 2012

Zir hun chhung : Sept.- December, 2012

Stipend : Zirlai pakhat hnenah thla
tin Rs. 500/- pek a ni ang
Hostel a awm lo.

Phone No 8575308007/ 2317343/2350082-
ah zawh fiah theih a ni.

Sd/-
Rev. R.Lalengmawia
Principal

NEICC INKHAWMPUI LEH PLATINUM JUBILEE LAWMNA

NEICC Inkhawmpui vawi 75-na chu May 16-20, 2012 khan Rymbai Presbyterian Kohhran Biak inah hman a ni a, a kum 75-na lawm nghal a ni. Unit 29 atangin palai 160 an kal a. He mi bakah hian Platinum Jubilee lawmnaa kal mi 300 chuang zet an awm baw. He Inkhawmpuia hian Mizoram Synod lam atangin Rev. Zosangliana Colney, Executive Secreatry leh Rev. Roger Gaikwad, Secretary NCCI-ten thuchah nung takin an sawi a. Upa Prof. Laltluangliana Khiangte, Principal, Serampore College-in Inkhawmpui chibai bukna leh tawngtaipui an ngaihna thu thiam takin a sawi tel baw a. Platinum Jubilee lawmna puala NEICC Women Association puala Inkhawmah Pi Lalrinkimi, Vice President (NEICCWA) - in thiam takin thu a sawi baw.



Thurel tam tak zingah UCC Chaplain dinhmun tur Executive Committee-in a rel chu pawm a ni a. Platinum Jubilee Building Research Centre-a hman tura rel a ni a, ‘UCC hnuaia Higher Secondary School lak hnan ni se’ tih te, ‘sawrkah leh sawrkah ni lote Pathiannia programme siam tawh lo tura ngen ni se,’ tihte pass a ni a, NEICC kum tina neih thin chu kum khat danah neih thin tawh tura rel a ni baw. Kum 2014-ah Sielmat, Churachandpur-ah Biennial Session hmasa ber neih a ni ang a; ICI Kohhranin an thleng dawn a ni.

Kum 2012-2014 chhunga Office Bearers atana thlante -

President : Rev.Dr.J.Huoplien Neitham (EFCI)

Vice President : 1) Rev.Zosangliana Colney (PCI, Mizoram Synod)
2) Rev.Greater Burn (GBC)

Treasurer : Elder K.Lyngkhoi (PCI, KJP Sepngi)

Executive & Standing Committees (Mizoram Synod atangin)

Executive Committee : Upa R. Zatlaia

Church Union Committee : Rev. Laltuithanga

Theological.Edu.Committee : Dr. T. Vanlaltlani (Convener)

Inkhawmpui boruak leh a chhehvel - Inkhawmpui neihna khua Rymbai hi Ladrymbai atanga km 5 chauh a ni a. In 1000 khua, lungalhthei khur nei, mi hausa tamna khua nia sawi a ni. In pawh an nei tha hlawm a, Concrete Building deuh vek a ni a, Kohhran pawh a changtlung hle. Presbyterian hlang awmna khua a ni a, zu zuar in khat mah an awm lo. Mikhual sem zei lutuk lo mah se a thlen lam an zei ve thung a, mikhual tana an thilphalnaah an fakawm hle. Inkhawm ban apiangin in tinin an ina chuangkaite thingpui leh chhang tuihnai tak tak an hlui thei zel. Sum an ngah viau naa Mizote angin Bike, Scooty, Computer, TV, Cellphone an lawm ve vak lo. A tula chauh pawisa an hman thin. Pawl hrang hrang kan ni baw a inkhawm boruak a zalen hle a, Biak inah tui an sem deuh reng a, kut kan beng hluah hluah reng baw, Presbyterian Upa tan chuan ip mai a awl hle. Zai pawl tam tak zingah kan Synod Choir an thiam chungchuang hle a, inpumkhatna boruak pawh an siam thiam ber. Mizoram Synod nih hi a lo va nuam em!

Reported by Upa C. Rochungnunga, Zohmun

HLA KÛTPUI

Synod Music Committee chuan July 14-15, 2012 chhung khian Kohhran tinah Hla Kûtpui hman turin ruahmanna a siam a; Solfa thluka sak tur leh Lengkhawm thluka sak tur hla pathum ve ve a thlang. Intihsiakin emaw, intihsiak lohvin emaw hman theih a ni.



BAWNGKAWN KOHHRAN HMEICHHIATEN June 3, 2012 Chawhnu khan Bawngkawna Synod-in ram a lei, tun hmaa Sulu Theatre (Cinema chhuahna in) awmna thinah urhsun takin tawngtai rualna hun an hman. He hmun hi Pu Jentere-a ram thin, thla hmasa lawka nuai 548-a Synod-in a lei kha a ni.

He lai hmuna Theatre-ah hian tun hma deuh chuan Pathianni chawhnu inkhawm lai takin cinema chhuah a ni thin a, inkhawm lova thalai rual an kal hum hum thin avangin Bawngkawna Kohhran hian Pathian hnenah he lai hmun hi an lo dil ve thin a. Kohhran Hmeichhiate hian khang hun laia an tawngtai thinna kha tunah hian chhanin a awm taah an ngai hial a ni.

SEC Thurel phek 1-na a mi chhunzawmna

1) Pathianin leilung piantirh atangin mihring hi mipaah leh hmeichhiaah a siam a. Mipa amah chauhva awm chu tha a ti lo va, amah tanpuitu tur a kawppui awm mi, hmeichhia a siamsak a. Mipa leh hmeichhia chauh hi nupaa insiam (innei) tur an ni (Gen. 1:28; 2:18).

2) Mipat hmeichhiatna hi mipa leh hmeichhe inkara inneihna huang chhungah chauh hman tur a ni (I Kor. 7:2; Heb. 13:4).

3) Mahni anpuite (mipa leh mipa, hmeichhia leh hmeichhia) lakah leh inneihna huang pawna mipat hmeichhiatna hman hi Pathianin mihring nihphung tura a siam dan bawhchhiatna a ni (Rom 1:26-27).

3. Nupa chungchang Dan thar: Nupa Chungchang Dan hman mek chu ennawn a ni a, siam that leh tihbelh ngaite siam thaa tihbelhin hman nghal tura pawm a ni a, a bua tihchhuah a ni ang.

4. Nu Leh Pa Ni hman dan tur: Synod-in a lo rel tawh 'Nu Leh Pa Ni' hman dan tur siam a ni a. Ni hman rek lovin Kristian Chhungkaw Ni - September Pathianni hnunung ber chawhnu Inkawmah nu leh pate hlutna leh pawimawhna inzirtirna te, tu leh fate enkawl that pawimawhna inzirtirna te neih thin tura tih a ni a, kum 2013 atangin Nilai leh Beihrial Thupui Buah he huna thupui zir tur telh ve thin tura tih a ni.

5. Pastor Refresher Course kalpui dan tur: Pastor-te intuai tharna (Refresher Course) kalpui dan tur chi hnih siam thar a ni a. India ram khawpui tlawh kual hmun hmingthang leh sakhaw hmunte tlawh emaw, Synod Mission Field-te tlawha thawk-tute nena inkawmhona hun hman emaw chu Refresher Course hman dan tura tih a ni.

6. Synod Archives awmna sawn: Kohhran thil vawn thatna, Synod Archives (Arkhaiv) chu Synod Office atangin Zosaphluia Building chung berah sawn chhuah tura tih a ni. Zosaphluia Building hi Synod Press leh Synod Bookroom inkara awm a ni a, Synod

Executive Secretary-te chenna atan a hnuai lam hman a ni.

7. Serampore (University) College kum 200-na puala sum thawh: Senate of Serampore College (University)-in Mizoram Presbyterian Kohhran Synod anrawn ngen angin he College kum 200 tlin hriatrengna tur project atan Rs. 20,00,000/- thawh remtih a ni a, cheng nuai 10 ve vein kum hnih chhungin budget-ah dah tura tih a ni.

8. Revival Beihpui: Synod Revival Committee-in an rawt angin District hmunpui (headquarter) pasarih chhunga Pastor Bial 19-a khawpui lian deuh deuh 51-ah October 15-21, 2012 chhungin Revival Beihpui buatsaih remtih a ni.

9. Kohhran pawl danga Revival Speaker kal dan: Kohhran pawl dangin Synod Revival Speaker-te rawngbawl tura an sawm chuan an kal phalsak theih a ni ang a, an kal man, etc. chu a sawmtu Kohhran tum tur a ni ang.

10. Ramthar Field Inchhiarna: Synod Ramthar rawngbawl na hrang hranga hman tur bik inchhiar dan tur ziaakna (statistics form) siam remtih a ni a, Synod hruaitute (OM) bawhzui tura dah a ni.

11. Doctor rawihna rate: Synod Hospital-a doctor rawihna/hlawh en that a ni a, doctor specialist contract-a rawihna Rs. 25,000/- p.m. leh medical officer contract-a rawihna Rs. 23,500/- p.m. a ni tawh ang.

12. Synod Office, Lunglei Bus: Synod-in a remtih angin Synod Office, Lunglei tan Bus, mi 23 thutna awm lei tura tih a ni a, Bus hman dan tur pawh siam nghal a ni.

13. Chhim lam chhawmdawl na: Chhim lama Presbyterian Kohhran mite chhawmdawl dan tur ruahmanna, OM-in an siam chu pawm a ni.

14. K.T.P. Diamond Jubilee lawm dilna remtih a ni, KTP Golden Jubilee hi 2014 KTP General Conference, Khawzawlah lawm a ni ang.

15. PCI-in a enkawl Karbi Anglong General Assembly Administrative Area (KAGAA)-a January 2013 atanga Assembly Officer hna thawk turin Rev. Dr. Lalhmangaiha ruat a ni a, tuna thawk mek Rev. V.L.Zaithanga a thlak ang.

SYNOD HOSPITAL, DURLANG APRIL, 2012 CHHUNGA THILPEK DAWNTE

I. CHARITY FUND

1. Vaivakawn Bial Kohhran Hmeichhia	Rs. 10,000/-
2. Pu Hualhnuna, Sihphir Venghlun	Rs. 1,000/-
3. Pu Biakdawla, Mualcheng North	Rs. 500/-
4. Pu H. Zathanga, Mualcheng	Rs. 500/-
5. VTR Computer Centre, Khatla	Rs. 500/-
6. Kolasib Venglai Kohhran	Rs. 5,000/-
7. Ngopa North Kohhran	Rs. 3,500/-
8. Phunchawng Kohhran Hmeichhia	Rs. 5,000/-
9. Dr. K. Lalremmawia, Hosp. Campus	Rs. 2,000/-
10. Dr. Rebecca Lalrintluangi, UCC	Rs. 2,000/-
11. Joseph Lalrinsailova, Director of Postal Services	Rs. 2,000/-
12. KTP, Lawngtlai Chanmari Bial	Rs. 1,000/-
13. Sihfa Pastor Bial	Rs. 5,000/-
14. Hliappui Bial Kohhran Hmeichhia	Rs. 5,000/-
15. Sihfa Bial Kohhran Hmeichhia	Rs. 2,000/-
16. Sialsuk Bial Kohhran Hmeichhia	Rs. 3,000/-
17. Hmingthup	Rs. 1,000/-
TOTAL	Rs. 49,000/-


II. THISEN PETE

	PEK ZAT
1. KTP, Dawrpui Vengthar Branch	51 Units
2. KTP, Edenthur Branch	30 Units
3. KTP, N.E. Tlangnuam Branch	11 Units
4. KTP, Sesawng Pastor Bial	46 Units
TOTAL	138 Units

III. THILDANG PETE

1. Kawlkulh Bial Koh. Hmeichhia	Hmunphiah 200
2. Rengtekawn Bial Koh. Hmeichhia	Hmunphiah 350
3. Kepran Kohhran Hmeichhia	Hmunphiah 100
4. Ruallung Kohhran Hmeichhia	Hmunphiah
5. Pukzing Bial Kohhran Hmeichhia	Hmunphiah 86
6. Pi Lallawmzuali, Finland	Rs. 15,000/- (K-ward tan TV man tur)
7. Hortoki Bial Kohhran Hmeichhia	Hmunphiah 230
8. Lunglei Venglai Bial Koh. Hmeichhia	Hmunphiah 105
9. Mualpheng Bial Koh. Hmeichhia	Hmunphiah 106
10. Kawlbem Kohhran Hmeichhia	Hmunphiah 50
11. Serchhip Bial Koh. Hmeichhia	Thutthleng 3

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah Isua Krista hmingin lawmthu kan sawi tak meuh meuh a ni e.


(Dr. LALREMTANGA)
Director,
Synod Hospital.

KRISTIAN TLANGAU CENTENARY PROJECT LEHKHABUTE

Kristian Tlangau Centenary Project leh-khabu chi thum - *Editorial* leh *Zawhna* leh *Chhanna* (₹ 150/- man), *Sermon 100 Thlan Chhuah* (₹ 120/- man) leh *Article 100 Thlan Chhuah* (₹ 120/- man) te hi Kristian Tlangau Office, Synod Office First Floor-ah lei tur a la awm. Aizawl khawpuia mite chuan Kohhran Secretary hnenah lei dan awlsam zawk zawh theih a ni baw.

